

TĒRĀ IA NGĀ WAI TAKETAKE

Tērā ia ngā wai taketake, ngā wai pūwhero o Hauraki

Ko te manawa o Tīkapakapa e tuku atu ana i tōna ia

Ki ngā kōngutuawa, ki ngā puna kau o Ōhinemuri, o Waihou, o Piako

Hei aha? Hei tapu ihi au, hei tapu ihi koe i roto i tōna ngongirua, i tōna wehi

He urunga tangata i te pōkai tara, matapaki, matawhāura ka rauhī noa ngā tāngata i te muri, i te tonga whakaemi te pātaka iringa kai i te autai, he unuhanga taniwha takina te mauri o

Papakauri, o Ureia

Kei wareware hoki ki te tūmatangaingai, te mana o te Takareko, o Te Mumuhau ko ngā manu kōrero, ngā manu arataki i taru tere mai ngā mātua tūpuna i Rangitawhitinui, i

Rangitawhitiroa he oranga mō ngā waka i te hukanga waihoe, ko Te Tara o Te Ika-a-Māui ka whakatekateka ngā aukume o Tangaroa kauaka te mahara e kōwhewheko pērā i te tūnginga

o te ahi kōmau, engari kia kōwhitawhita rā, ahakoa ngā tairo-a-Kupe kotahi atu ki te ihu o te waka, kei mōtītī, kei mōtātā, hihiritia rā ngā kauwhau o mua hei tirohanga atu ki te

whakarewa mai o te kurehu o ngā keho i Moehau, i Te Aroha kei te poho o te iwi, kua tatū

ngā waewae o Rēhua, tū te hakahaka-a-Tāne-Rore! He ika ki te moana, ko au ki te whenua ko

Tīkapa oneone hokinga kāinga

E kō kō ia, e ara, e!